

文殊師利菩薩問菩提經論

天親菩薩造 菩提流支譯



文殊師利菩薩問菩提經論（伽耶山頂經論）

天親菩薩造 元魏天竺三藏菩提流支譯

A01 序分	4
A02 所應聞弟子成就分	5
A03 三昧分	8
A04 能觀清淨分	8
A05 所觀法分	11
B01 以何等人能證菩提	12
B02 以何等智能證菩提	14
B03 何者是所證菩提	15

A06	起分	20
A07	顯說分	21
A08	菩薩功德勢力分	24
B01	如心所求一切滿足	28
B02	無障礙樂說辯才說法	32
A09	菩薩行差別分	40
B01	功德清淨道	41
B02	因清淨道	43
C01	證法界	50
D01	十種智	52

D02	十種發	53
D03	十種行	56
D04	十一種無盡觀示現	58
D05	十種對治法示現	60
D06	十種寂靜地示現	62
C02	諸菩薩摩訶薩隨順如實修行義	64

文殊師利菩薩問菩提經論 〔伽耶山頂經論〕

見諸眾生煩惱縛 起菩提願為救拔 如是正覺慈悲尊 頂禮造論釋經故

我論能盡煩惱怨 救護諸有斷惡道 如是二種最勝利 一切外道論中無

此修多羅所攝有九分：

①序分，②所應聞弟子成就分，③三昧分，④能觀清淨分，⑤所觀法分，⑥起分，⑦顯說分，⑧菩薩功德勢力分，⑨菩薩行差別分。

A01 序分

如是我聞：一時，婆伽婆住伽耶城。伽耶山頂塔，初得菩提。

如是我聞：一時，婆伽婆者，集法者語。

住伽耶城者，示現所住處成就故。

伽耶山頂者，示現彼形相大眾行住處故。

塔者，示現為彼能供養者，興供養故。

初得菩提者，即彼成佛時故。

又，伽耶山頂塔者，根本序分，以無量諸佛所住處故，示現彼處諸佛如來集故。

此法門者，諸佛如來所攝護故。應聞此修多羅者，攝取成就。

A02 所應聞弟子成就分

與大比丘眾，滿足千人俱，其先悉是辮髮梵志。①應作已作；②所作已辦；③棄捨重擔；④逮得己利；⑤盡諸有結；⑥正智心得解脫；⑦一切心得自在，已到彼岸；⑧皆是阿羅漢。

與大比丘眾者，以其大故。以不增不損故，滿足千比丘學無學。

辮髮梵志者，此明學、無學比丘，是名聽者成就。

又，無學者有八種德，何等為八：

- ①所作畢竟，如經「應作已作」故。
- ②畢竟過於應作已作，如經「所作已辦」故。
- ③遠離三昧障，如經「棄捨重擔」故。
- ④捨離所受重擔，如經「逮得己利」故。彼重擔者，所謂五陰。
- ⑤證涅槃，如經「盡諸有結」故。
- ⑥過三界，如經「正智心得解脫」故。
- ⑦依不顛倒，受教修行，如經「一切心得自在，已到彼岸」故，以善遠離諸

煩惱故。

⑧如實修行四如意足，如經「皆是阿羅漢」故。

又，阿羅漢者，能受信者所施物故，故名應供。

又，學有二種，何等為二：

①善畢竟持戒學道故，

②如心所求，畢竟滿足故。

諸菩薩摩訶薩，無量無邊，皆從十方世界來集。有大威德，皆得諸忍、諸陀羅尼、諸深三昧、具諸神通。其名曰：文殊師利菩薩、觀世音菩薩、得大勢菩薩、香象菩薩、勇施菩薩、勇修行智菩薩等而為上首。如是諸菩薩摩訶薩，其數無量。

次說諸菩薩行差別。

彼菩薩行有二種攝法所攝。何等為二？一者因攝，二者果攝。

并諸天、龍、夜叉、乾闥婆、阿修羅、迦樓羅、緊那羅、摩睺羅伽，人、非人等，大眾圍遶。

A03 三昧分

爾時，世尊獨靜無人，入於諸佛甚深三昧，觀察法界。

入三昧觀察者，示現非是思量境界故。

又，入三昧者，示現不同聲聞辟支佛故，此明非聲聞辟支佛境界故。

A04 能觀清淨分

而作是念：我得阿耨多羅三藐三菩提，得一切智慧：①所作已辦；②除諸重

擔；③度諸有嶮道；④滅無明；⑤得真明；⑥拔諸箭；⑦斷渴愛；⑧成法船；
⑨擊法鼓；⑩吹法螺；⑪建法幢；⑫轉生死種；⑬示涅槃性；⑭閉塞邪道；⑮
開於正路；⑯離諸罪田；⑰示于福田。

能觀清淨者，示現已得菩提故。如經：「而作是念：我得阿耨多羅三藐三菩提」故。

得菩提者，示現勝彼聲聞辟支佛證智故。如經：「得一切智慧」故。

彼得一切智慧者，有十七種，何等十七？

①本願滿足。如經「所作已辦」故。

②捨離所取重擔。如經「除諸重擔」故。又，重擔者，所謂五陰。

③善斷一切諸煩惱障。如經「度諸有嶮道」故。

- ④善斷一切智障。如經「滅無明」故。
- ⑤證如實妙法。如經「得真明」故。
- ⑥離一切邪箭。如經「拔諸箭」故。
- ⑦離諸願。如經「斷渴」愛故。
- ⑧成就出世間慧。如經「成法船」故。
- ⑨轉妙法輪。如經「擊法鼓」故。
- ⑩出無我妙聲善能降伏一切諸魔。如經「吹法螺」故。
- ⑪善能降伏一切外道。如經「建法幢」故。
- ⑫善斷一切諸結因緣。如經「轉生死種」故。
- ⑬說世間出世間妙法。如經「示現涅槃性」故。

- ⑭善能遠離顛倒取相。如經「閉塞邪道」故。
- ⑮轉八聖道。如經「開於正路」故。
- ⑯善能遠離外道福田。如經「離諸罪田」故。
- ⑰示現三寶福田。如經「示于福田」故。

A05 所觀法分

我今當觀彼法：誰得阿耨多羅三藐三菩提？以何等智得阿耨多羅三藐三菩提？何者是所證阿耨多羅三藐三菩提法？

以何等人能證菩提？以何等智能證菩提？何者是所證菩提？

觀彼三法，於三世中，虛妄分別，無有實體。

為以身得？為以心得？

為以身得，為以心得者，示現身心不證菩提故。

此明何義？以離身心，更無實者。如愚癡人，虛妄分別，無有如是證菩提者故。

B01 以何等人能證菩提

以何等人能證菩提者。彼法於三世中，虛妄分別，無實體者，以非身得菩提示現。

若以身得，身則：①無知無覺；②如草如木，如塊如影；③無所識知；④四大所造；⑤從父母生；⑥其性無常；⑦假以衣服、飲食、臥具、澡浴，而得存立；⑧此法必歸敗壞磨滅。

有八種法示現彼身不證菩提，何等為八？

- ①無作者。如經「若以身得，身則無知無覺」故。
 - ②虛妄取相成就。如經「如草如木，如塊如影」故。
 - ③遠離諸想。如經「無所識知」故。
 - ④以諸因緣和合故生。如經「四大所造」故。
 - ⑤體本不淨。如經「從父母生」故。
 - ⑥念不住。如經「其性無常」故。
 - ⑦如危朽物，不可常保。如經「假以衣服、飲食、臥具、澡浴，而得存立」故。
 - ⑧體是不實。如經「此法必歸敗壞磨滅」故。
- 已說非身得菩提示現。

B02 以何等智能證菩提

以何等智得菩提者。彼法於三世中，虛妄分別，無有實體，以非心得菩提示現。

若以心得：①心則如幻；②從眾緣生；③無處；④無相；⑤無物；⑥無所有。

有六種法示現彼心不得菩提，何等為六？

- ①見顛倒法虛妄誑惑愚癡凡夫。如經「心則如幻」故。
- ②依善不善諸因緣生。如經「從眾緣生」故。
- ③無定住處。如經「無處」故。
- ④虛妄分別取相實不可得。如經「無相」故。

⑤自性空。如經「無物」故。

⑥遠行。如經「無所有」故。

已說非心得菩提示現。

B03 何者是所證菩提

菩提者，但有名字，世俗故說：①無聲；②無色；③無成；④無行；⑤無入；⑥不可見；⑦不可依；⑧去來道斷；⑨過諸言說；⑩出於三界；⑪無見；⑫無聞；⑬無覺；⑭無著；⑮無觀；⑯離戲論；⑰無諍；⑱無示；⑲不可觀；⑳不可見；㉑無響；㉒無字；㉓離言語道。

菩提者，但有名字，世俗故說者，示現可證法但有名，用虛妄分別，其體無實故，彼但有名字，世俗故說，有二十三種。何等二十三？

- ①無事。如經「無聲」故。
- ②過覺境界。如經「無色」故。
- ③諸法體空。如經「無成」故。
- ④離諸相。如經「無行」故。
- ⑤過一切世間凡夫境界。如經「無入」故。
- ⑥過識境界。如經「不可見」故。
- ⑦無可依處。如經「不可依」故。
- ⑧不生滅。如經「去來道斷」故。
- ⑨過一切世間名字。如經「過諸言說」故。
- ⑩善不善行諸法不可得。如經「出於三界」故。

- ⑪離見者。如經「無見」故。
- ⑫過耳識境界。如經「無聞」故。
- ⑬過意識境界。如經「無覺」故。
- ⑭不住。如經「無著」故。
- ⑮如虛空。如經「無觀」故。
- ⑯無為。如經「離戲論」故。
- ⑰無諸患離諸漏。如經「無諍」故。
- ⑱過小智境界。如經「無示」故。
- ⑲無量。如經「不可觀」故。
- ⑳他不能見。如經「不可見」故。

②1內心無知。如經「無響」故。

②2無物可見。如經「無字」故。

②3不可說。如經「離言語」故。

如是能證菩提者，以何等智證菩提者？

所證菩提法者，如是諸法，但有名字，但假名說，但和合名說。

依世俗名說：①無分別，分別說；②假成，無成；③無物，離物；④無取；

⑤不可說；⑥無著。

次說云何證菩提者，彼亦但有假名名字，依世俗說，虛妄分別，無實體故。

彼依世俗名說，有六種。何等為六？

①不實分別。如經「無分別，分別說」故。

- ②體空。如經「假成，無成」故。
- ③我不可得。如經「無物，離物」故。
- ④過世間慧。如經「無取」故。
- ⑤過言語道。如經「不可說」故。
- ⑥遠離我我所。如經「無著」故。

彼處無人證，無所用證，亦無法可證。如是通達，是則名為得阿耨多羅三藐三菩提，無異離異，無菩提相。

彼處無人證，無所用證，亦無法可證，如是通達，是則名為得阿耨多羅三藐三菩提者，此明何義？明能證人、明所用證智、明所證境界。彼如是法，以何等法用妙正智慧，如實知所見所知所證，是名得阿耨多羅三藐三菩提故。

無異離異，無菩提相者，此明何義？無異離異二句，明彼證法清淨寂靜故。
無菩提相義，如向所說。

已說所觀事分。

A06 起分

起分者，此中復有何義？以三昧事訖故，以說時至故，是故應起。

又，於此中有二種義：

①以三昧中所觀察義，欲為文殊師利說故。

②文殊師利問，如來答故。

何故如來唯告文殊師利，而不告餘者？以依對文殊師利說此法故。

又復何故唯對文殊師利說此法門？以此所說法門深故，是故告彼深智慧菩

薩。

又，何以故唯文殊師利問？以如來但告文殊師利故。是故，文殊師利問隨順義故。彼所發問，以心清淨問，答清淨故。

A07 顯說分

爾時，文殊師利法王子在大眾中，立佛右面，執大寶蓋以覆佛上。

時，文殊師利默知世尊所念如是，即白佛言：世尊！若菩提如是相者，善男子善女人，云何「於菩提發心住」？

佛告文殊師利：善男子善女人，應如是知菩提相而發心住。

文殊師利言：世尊！菩提相者，當云何知？

佛告文殊師利：菩提相者，出於三界，過一切世俗名字語言，過一切響，無

發心發。滅諸發，是發菩提心住。

是故，文殊師利！諸菩薩摩訶薩，過一切發，是發心住。

文殊師利！無發，是發菩提心住。

文殊師利！發菩提心者，無物發住，是發菩提心住。

文殊師利！發菩提心者，無障礙住，是發菩提心住。

文殊師利！發菩提心者，如法性住，是發菩提心住。

文殊師利！發菩提心者，不執著一切法，是發菩提心住。

文殊師利！發菩提心者，不破壞如實際，是發菩提心住。

文殊師利！發菩提心者，不移不益不異不一，是發菩提心住。

文殊師利！發菩提心者，如鏡中像，如熱時焰，如影、如響，如虛空，如水

中月，應當如是發菩提心住。

彼發清淨有八種，何等為八：

- ①捨一切戲論。如經「無發，是發菩提心住」故。
- ②捨取諸法。如經「發菩提心者，無物發住，是發菩提心住」故。
- ③如虛空。如經「發菩提心者，無障礙住，是發菩提心住」故。
- ④寂靜。如經「發菩提心者，如法性住，是發菩提心住」故。
- ⑤捨取常無常相。如經「發菩提心者，不執著一切法，是發菩提心住」故。
- ⑥不毀道不捨道。如經「發菩提心者，不破壞如實際，是發菩提心住」故。
- ⑦離謗離著。如經「發菩提心者，不移不益不異不一，是發菩提心住」故。
- ⑧入一切法一相。如經「發菩提心者，如鏡中像，如熱時焰，如影如響，如

虛空，如水中月，應當如是發菩提心住」故。

又，如實修行般若波羅蜜，餘四句過三界等者，如前所說應知。

已顯說分。

A08 菩薩功德勢力分

爾時，會中有天子名月淨光德，得不退阿耨多羅三藐三菩提心，問文殊師利言：諸菩薩摩訶薩，初觀何法故行菩薩行？依何法故行菩薩行？

文殊師利答言：天子！諸菩薩摩訶薩行，以大悲為本，為諸眾生。

天子又問：文殊師利！諸菩薩摩訶薩大悲，以何為本？

文殊師利答言：天子！諸菩薩摩訶薩大悲，以直心為本。

天子又問：文殊師利！諸菩薩摩訶薩直心，以何為本？

文殊師利答言：天子！諸菩薩摩訶薩直心，以於一切眾生平等心為本。

天子又問：文殊師利！諸菩薩摩訶薩，於一切眾生平等心，以何為本？

文殊師利答言：天子！諸菩薩摩訶薩，於一切眾生平等心，以無異離異行為本。

天子又問：文殊師利！諸菩薩摩訶薩無異離異行，以何為本？

文殊師利答言：天子！諸菩薩摩訶薩無異離異行，以深淨心為本。

天子又問：文殊師利！諸菩薩摩訶薩深淨心，以何為本？

文殊師利答言：天子！諸菩薩摩訶薩深淨心，以阿耨多羅三藐三菩提心為本。

天子又問：文殊師利！諸菩薩摩訶薩阿耨多羅三藐三菩提心，以何為本？

文殊師利答言：天子！諸菩薩摩訶薩阿耨多羅三藐三菩提心，以六波羅蜜為本。

天子又問：文殊師利！諸菩薩摩訶薩六波羅蜜，以何為本？

文殊師利答言：天子！諸菩薩摩訶薩六波羅蜜，以方便慧為本。

天子又問：文殊師利！諸菩薩摩訶薩方便慧，以何為本？

文殊師利答言：天子！諸菩薩摩訶薩方便慧，以不放逸為本。

天子又問：文殊師利！諸菩薩摩訶薩不放逸，以何為本？

文殊師利答言：天子！諸菩薩摩訶薩不放逸，以三善行為本。

天子又問：文殊師利！諸菩薩摩訶薩三善行，以何為本？

文殊師利答言：天子！諸菩薩摩訶薩三善行，以十善業道為本。

天子又問：文殊師利！諸菩薩摩訶薩十善業道，以何為本？

文殊師利答言：天子！諸菩薩摩訶薩十善業道，以持戒為本。

天子又問：文殊師利！諸菩薩摩訶薩持戒，以何為本？

文殊師利答言：天子！諸菩薩摩訶薩持戒，以正憶念為本。

天子又問：文殊師利！諸菩薩摩訶薩正憶念，以何為本？

文殊師利答言：天子！諸菩薩摩訶薩正憶念，以正觀為本。

天子又問：文殊師利！諸菩薩摩訶薩正觀，以何為本？

文殊師利答言：天子！諸菩薩摩訶薩正觀，以堅念不忘為本。

諸菩薩摩訶薩功德勢力有二種，何等為二：

①如心所求，一切滿足。

②無障礙樂說辯才說法。

B01 如心所求一切滿足

如心所求一切滿足者，以起上上勝勝法故。彼起上上勝勝法者，有十四種。何等十四？

- ①受教不忘。如經：「天子又問：文殊師利！諸菩薩摩訶薩正觀，以何為本？文殊師利答言：天子！諸菩薩摩訶薩正觀，以堅念不忘為本」故。
- ②善取正教，觀有為法。如經：「天子又問：文殊師利！諸菩薩摩訶薩正憶念，以何為本？文殊師利答言：天子！諸菩薩摩訶薩正憶念，以正觀為本」故。
- ③無彼處過。如經：「天子又問：文殊師利！諸菩薩摩訶薩持戒，以何為

本？文殊師利答言：天子！諸菩薩摩訶薩持戒，以正憶念為本」故。

④不隨順諸過。如經：「天子又問：文殊師利！諸菩薩摩訶薩十善業道，以何為本？文殊師利答言：天子！諸菩薩摩訶薩十善業道，以持戒為本」故。

⑤善修十善業道。如經：「天子又問：文殊師利！諸菩薩摩訶薩三善行，以何為本？文殊師利答言：天子！諸菩薩摩訶薩三善行，以十善業道為本」故。

⑥身口意業三法清淨。如經：「天子又問：文殊師利！諸菩薩摩訶薩不放逸，以何為本？文殊師利答言：天子！諸菩薩摩訶薩不放逸，以三善行為本」故。

- ⑦戒清淨。如經：「天子又問：文殊師利！諸菩薩摩訶薩方便慧，以何為本？文殊師利答言：天子！諸菩薩摩訶薩方便慧，以不放逸為本」故。
- ⑧隨順利益一切眾生。如經：「天子又問：文殊師利！諸菩薩摩訶薩六波羅蜜，以何為本？文殊師利答言：天子！諸菩薩摩訶薩六波羅蜜，以方便慧為本」故。
- ⑨滿足一切助菩提法。如經：「天子又問：文殊師利！諸菩薩摩訶薩阿耨多羅三藐三菩提心，以何為本？文殊師利答言：天子！諸菩薩摩訶薩阿耨多羅三藐三菩提心，以六波羅蜜為本」故。
- ⑩不疲倦。如經：「天子又問：文殊師利！諸菩薩摩訶薩深淨心，以何為本？文殊師利答言：天子！諸菩薩摩訶薩深淨心，以阿耨多羅三藐三菩提

心為本」故。

- ⑪業果清淨。如經：「天子又問：文殊師利！諸菩薩摩訶薩無異離異行，以何為本？文殊師利答言：天子！諸菩薩摩訶薩無異離異行，以深淨心為本」故。
- ⑫修行清淨。如經：「天子又問：文殊師利！諸菩薩摩訶薩於諸眾生平等心，以何為本？文殊師利答言：天子！諸菩薩摩訶薩於諸眾生平等心，以無異離異行為本」故。
- ⑬作利益一切眾生清淨。如經：「天子又問：文殊師利！諸菩薩摩訶薩直心，以何為本？文殊師利答言：天子！諸菩薩摩訶薩直心，以於一切眾生平等心為本」故。

⑭心清淨。如經：「天子又問：文殊師利！諸菩薩摩訶薩大悲，以何為本？

文殊師利答言：天子！諸菩薩摩訶薩大悲，以直心為本」故。

又，經言：「爾時，會中有天子，名月淨光德，得不退阿耨多羅三藐三菩提心，問文殊師利言：諸菩薩摩訶薩初緣何法故行菩薩行？依何法故行菩薩行？文殊師利答言：諸菩薩摩訶薩行大悲為本，為諸眾生。」如是等修多羅，從後向前解釋，應知。

B02 無障礙樂說辯才說法

天子又問：文殊師利！諸菩薩摩訶薩有幾種心，能成就因、能成就果？

文殊師利答曰：天子！諸菩薩摩訶薩有四種心，能成就因、能成就果。

何等為四？一者初發心，二者行發心，三者不退發心，四者一生補處發心。

復次，天子！初發心，如種種子。第二行發心，如芽生增長。第三不退發心，如莖、葉、花、果初始成就。第四一生補處發心，如果等有用。

復次，天子！初發心，如車匠集材智。第二行發心，如斫治材木淨智。第三不退發心，如安施材木智。第四一生補處發心，如車成運載智。

復次，天子！初發心，如月始生。第二行發心，如月五日。第三不退發心，如月十日。第四一生補處發心，如月十四日。如來智慧，如月十五日。

復次，天子！初發心，能過聲聞地。第二行發心，能過辟支佛地。第三不退發心，能過不定地。第四一生補處發心，安住定地。

復次，天子！初發心，如學初章智。第二行發心，如差別諸章智。第三不退發心，如算數智。第四一生補處發心，如通達諸論智。

復次，天子！初發心，從因生。第二行發心，從智生。第三不退發心，從斷生。第四一生補處發心，從果生。

復次，天子！初發心，因攝。第二行發心，智攝。第三不退發心，斷攝。第四一生補處發心，果攝。

復次，天子！初發心，因生。第二行發心，智生。第三不退發心，斷生。第四一生補處發心，果生。

復次，天子！初發心，因差別分。第二行發心，智差別分。第三不退發心，斷差別分。第四一生補處發心，果差別分。

復次，天子！初發心，如取藥草方便。第二行發心，如分別藥草方便。第三不退發心，如病服藥方便。第四一生補處發心，如病得瘥方便。

復次，天子！初發心，學法王家生。第二行發心，學法王法。第三不退發心，能具足學法王法。第四一生補處發心，學法王法，能得自在。

無礙樂說辯才說法，有四種發菩提心攝取十地，以種種差別說故。

彼種種差別有十二句，經言：「天子又問：文殊師利！諸菩薩摩訶薩有幾種心能成就因、能成就果？文殊師利答言：天子！諸菩薩摩訶薩有四種心能成就因、能成就果。何等為四？①初發心，②行發心，③不退發心，④一生補處發心」者。初發心能與第二行發心作因，第二行發心能與第三不退發心作因，第三不退發心能與第四一生補處發心作因。此句明上上因勝勝不失故。

「復次，天子！初發心，如種種子。第二行發心，如芽生增長。第三不退發心，如莖葉花果初始成就。第四一生補處發心，如果等有用」者，示現從清淨

因成就清淨果故。

「復次，天子！初發心，如車匠集材智」者，以依諸願則能攝取一切佛法故。

「第二行發心，如斫治材木淨智」者，以成就清淨戒故。

「第三不退發心，如安施材木智」者，以依慧方便修一切行皆相應故。

「第四一生補處發心，如車成運載智」者，以不捨先許重擔故。

「復次，天子！初發心，如月始生。第二行發心，如月五日。第三不退發心，如月十日。第四一生補處發心，如月十四日。如來智慧，如月十五日」者，以示現上上大力清淨故。

「復次，天子！初發心，能過聲聞地」者，以初地前菩薩利根，觀察一切菩

提分法故。

「第二行發心，能過辟支佛地」者，以初地前菩薩依般若勝智，能集諸菩薩無量行故。

「第三不退發心，能過不定地」者，此已入初地得證智故；又過聲聞辟支佛地者，以過一切功用行故。

「第四一生補處發心，安住定地」者，以善住王子地故。

「復次，天子！初發心，如學初禪智」者，以觀下地法故。

「第二行發心，如差別諸章智」者，以智慧增長差別故。

「第三不退發心，如算數智」者，以方便智能數一切法故。

「第四一生補處發心，如通達諸論智」者，以得證智故。

「復次，天子！初發心，從因生」者，以自性清淨本來成就故。

「第二行發心，從智生」者，以攝取世間出世間聞慧方便故。

「第三不退發心，從斷生」者，以過一切世間戲論故。

「第四一生補處發心，從果生」者，以自然成就一切行故。

「復次，天子！初發心，因攝」者，以信行助道淳熟故，又以觀初地境界故。

「第二行發心，智攝」者，以依境界淳熟觀功用行故。

「第三不退發心，斷攝」者，以依修行境界未得佛法觀故。

「第四一生補處發心，果攝」者，以依果淳熟隨所有佛國土，應成佛處即成佛故。

「復次，天子！初發心，因生」者，以不顛倒修行善根性故。

「第二行發心，智生」者，以不顛倒法究竟性故。

「第三不退發心，斷生」者，以不顛倒修行性故。

「第四一生補處發心，果生」者，以得心自在故。

「復次，天子！初發心，因差別分」者，以攝取無量善根故。

「第二行發心，智差別分」者，以無量無邊法門畢竟究竟故。

「第三不退發心，斷差別分」者，以入無量三昧門故。

「第四一生補處發心，果差別分」者，以無量神通奮迅隨意自在用故。

「復次，天子！初發心，如取藥草方便」者，以攝取對治煩惱病法故。

「第二行發心，如分別藥草方便」者，以知對治煩惱病隨相應藥故。

「第三不退發心，如病服藥方便」者，以依知諸方便隨相應受用故。

「第四一生補處發心，如病得瘥方便」者，以煩惱病滅故。

「復次，天子！初發心，學法王家生」者，以降伏一切聲聞辟支佛故。

「第二行發心，學法王法」者，以學一切得勝處故。

「第三不退發心，能具足學法王法」者，以得修道勝果故。

「第四一生補處發心，學法王法，能得自在」者，以於一切法中能得自在無障礙故。

已說菩薩功德勢力分。

A09 菩薩行差別分

法主世尊親在眾中，何故乃問文殊師利？以為示現諸菩薩摩訶薩功德故。此

以何義？以諸眾生於菩薩所起輕慢心，令生尊重恭敬心故。

諸菩薩摩訶薩行差別有二種道，何等為二？①功德清淨道，②因清淨道。

B01 功德清淨道

爾時，大眾中，有天子，名定光明主，不退阿耨多羅三藐三菩提心。

時，定光明主天子問文殊師利法王子言：何等是諸菩薩摩訶薩畢竟略道？諸菩薩摩訶薩以是略道，疾得阿耨多羅三藐三菩提。

文殊師利答言：天子！諸菩薩摩訶薩略道有二種，諸菩薩摩訶薩以是二道，疾得阿耨多羅三藐三菩提。

何等為二？一者方便道，二者慧道。

方便者，知攝善法智。慧者，如實知諸法智。

又，方便者，觀諸眾生智。慧者，離諸法智。

又，方便者，知諸法相應智。慧者，知諸法不相應智。

又，方便者，觀因道智。慧者，滅因道智。

功德清淨道者有八種，何等為八：

①攝取智教化一切眾生。如經：「又，方便者，知攝善法智」故。

②能忍一切眾生諸不善行。如經：「慧者，如實知諸法智」故。

③集諸白淨法。如經：「又，方便者，觀一切眾生智」故。

④觀一切菩提分法。如經：「慧者，離諸法智」故。

⑤知諸法和合相。如經：「又，方便者，知諸法相應智」故。

⑥知諸法不同相。如經：「慧者，知諸法不相應智」故。又，慧者，知諸法

不相應智者，以種種願故。

⑦如實知可化眾生。如經：「又，方便者，觀因道智」故。

⑧集種種助道。如經：「慧者，滅因道智」故。

B02 因清淨道

因清淨道者，以示現勝因清淨故。

彼勝因清淨者以四種發心說。何等為四？

①說助清淨道，②說功德智道，③說實際證道，④說如實修行道。

又，方便者，知諸法差別智。慧者，知諸法無差別智。

又，方便者，莊嚴佛土智。慧者，莊嚴佛土平等無差別智。

又，方便者，入眾生諸根行智。慧者，不見眾生智。

又，方便者，得至道場智。慧者，能證一切佛菩提法智。

因清淨道亦有八種，何等為八：

- ①觀善不善法。如經：「又，方便者，知諸法差別智」故。
- ②離諸因緣一切法根本。如經：「慧者，知諸法無差別智」故。
- ③離一切障礙。如經：「又，方便者，莊嚴佛土智」故。
- ④斷一切和合。如經：「慧者，莊嚴佛土平等無差別智」故。
- ⑤如實知。如經：「又，方便者，入眾生諸根行智」故。
- ⑥入一法門。如經：「慧者，不見眾生智」故。
- ⑦如實知一切凡夫虛妄分別。如經：「又，方便者，得至道場智」故。
- ⑧證寂靜界。如經：「慧者，能證一切佛菩提法智」故。

復次，天子！謂菩薩摩訶薩，復有二種略道，諸菩薩摩訶薩以是二道，疾得阿耨多羅三藐三菩提。

何等為二？一者助道，二者斷道。

助道者，五波羅蜜。斷道者，般若波羅蜜。

復有二種略道。

何等為二？一者有礙道，二者無礙道。

有礙道者，五波羅蜜。無礙道者，般若波羅蜜。

復有二種略道。

何等為二？一者有漏道，二者無漏道。

有漏道者，五波羅蜜。無漏道者，般若波羅蜜。

復有二種略道。

何等為二？一者有量道，二者無量道。

有量道者，取相分別。無量道者，不取相分別。

復有二種略道。

何等為二？一者智道，二者斷道。

智道者，謂從初地乃至七地。斷道者，謂從八地乃至十地。

復有二種略道。何等為二？一者功德道，二者智道。

功德道者，集種種善根。如經：「助道者，五波羅蜜」故。

智道者，通達一切法。如經：「斷道者，般若波羅蜜」故。

又，經言：「復有二種略道，何等為二？一者有礙道，二者無礙道。」

「有礙道者，五波羅蜜」者，以行三界故，此初地已前。

「無礙道者，般若波羅蜜」者，以過三界，入初地證智故。

「復有二種略道。何等為二？一者有漏道，二者無漏道。」

「有漏道者，五波羅蜜」者，以成就世間果故，此初地已前。

「無漏道者，般若波羅蜜」者，以成就出世間果故，此已得出世間智故。

「復有二種略道。何等為二？一者有量道，二者無量道。」

「有量道者，取相分別」者，以遍取識境界故。

「無量道者，不取相分別」者，以過識境界不見遍取故。

「復有二種略道，何等為二？一者智道，二者斷道。」

「智道者，謂從初地乃至七地」者，以如實知有為界故。

「斷道者，謂從八地乃至十地」者，以如實知無為界故。

爾時，會中有菩薩摩訶薩，名勇修行智，問文殊師利法王子言：何謂「菩薩摩訶薩義」？何謂「菩薩摩訶薩智」？

文殊師利答言：善男子！義，名不相應。智，名相應。

勇修行智菩薩言：文殊師利！何謂「義名不相應」？何謂「智名相應」？

文殊師利言：善男子！義，名無為。彼義，無有一法共相應，無有一法不共相應。何以故？以無變、無相故。

義者，無有一法共相應，無有一法不共相應，以本不成就義故。是故，無有一法共相應，無有一法不共相應。

義者，不移不益，無有一法共相應，無有一法不共相應故。

「善男子！義，名不相應。智，名相應」者，示現實際有四種。

「善男子！義，名無為，彼義，無有一法共相應，無有一法不共相應。何以故？以無變、無相故」者，以離諸無常過故。

是故，經言：「義者，無有一法共相應，無有一法不共相應」故，以自體性住故。

如經：「以本不成就義故，是故經言無有一法共相應，無有一法不共相應」故，以常真如法界實體住故。

是故，經言：「義者，不移不益，無有一法共相應，無有一法不共相應」故。又，無有一法不移不益者，以法界不增不減故。

善男子！智者，名道。道者，心共相應，非不相應。

善男子！以是義故，智名相應，非不相應。

復次，善男子！智，名斷相應。是故，善男子！智名相應法，非不相應法。

復次，善男子！智，名善觀五陰、十二入、十八界、十二因緣、是處非處。

善男子！以是義故，智名相應，非不相應。

「善男子！智者，名道。道者，心共相應，非不相應」者，自此以下，次說為證法界，有三種句六種十法。

C01 證法界

此明何義？以何等智云何證？為何義何處住能證法界？以何等智者，以三種句六種十法示現。

云何三種句示現何等智？

智者，謂道。道者，心相應法，非不相應法。是故，經言：「善男子！以是義故，智名相應，非不相應」故。

又，智共眷屬能證法界。何以故？以心清淨故道清淨，以道清淨故心清淨故。

復次，善男子！智，名斷相應。是故，善男子！智，名相應法，非不相應法者，以遞共依止故。

復次，善男子！智，名善觀五陰、十二入、十八界、十二因緣、是處非處。善男子！是故，智，名相應，非不相應者，以如實知可知境界故。

已說三種句，次說六種十法。初說十種智。

D01 十種智

復次，善男子！諸菩薩摩訶薩，有十種智。

何等為十？一者因智、二者果智、三者義智、四者方便智、五者慧智、六者攝智、七者波羅蜜智、八者大悲智、九者教化眾生智、十者不著一切法智。

善男子！是名諸菩薩摩訶薩十種智。

諸菩薩摩訶薩，有十種智。何等為十？

- ①因智者，以善知無始世來解脫種子故。
- ②果智者，以如實知無始世來種種業報故。
- ③義智者，以善知自利利他故。
- ④方便智者，以能增長微少善根令無量故。

- ⑤慧智者，以能觀察善不善法故。
- ⑥攝智者，以攝取法施資生施故。
- ⑦波羅蜜智者，以善知成就種種善根故。
- ⑧大悲智者，以依善根能起善行故。
- ⑨教化眾生智者，以善觀察時非時故。
- ⑩不著一切諸法智者，以離二邊修行中道故。

善男子！是名諸菩薩摩訶薩十種智。

已說初十種智，次說第二十種發。

D02 十種發

復次，善男子！諸菩薩摩訶薩，有十種發。

何等為十？一者身發，欲令一切眾生身業清淨故。二者口發，欲令一切眾生口業清淨故。三者意發，欲令一切眾生意業清淨故。四者內發，以不虛妄分別一切諸眾生故。五者外發，以於一切眾生平等行故。六者智發，以具足佛智清淨故。七者清淨國土發，以示一切諸佛國土功德莊嚴故。八者教化眾生發，以知一切煩惱病藥故。九者實發，以成就定聚故。十者無為智滿足心發，以不著一切三界故。

善男子！是名諸菩薩摩訶薩十種發。

諸菩薩摩訶薩，有十種發。何等為十？

- ①身發，欲令一切眾生身業清淨故，
- ②口發，欲令一切眾生口業清淨故，

- ③意發，欲令一切眾生意業清淨故者，以為遠離身口意業一切惡行，發大精進故。
- ④內發，不虛妄分別一切諸眾生故者，以不著諸法故。
- ⑤外發，於一切眾生平等行故者，以遠離憎愛故。
- ⑥智發，以具足佛智清淨故者，以平等教化一切眾生故。
- ⑦清淨國土發，以示一切佛國土功德莊嚴故者，以聞慧智不顛倒求法故。
- ⑧教化眾生發，以知一切煩惱病藥故者，以於一切法中得自在故。
- ⑨實發，以成就定聚故者，以如實知心使隨相應說法故。
- ⑩無為智滿足心發者，以發實法故。不著一切三界故者，以心不著虛妄法故。

又，實不實心，離虛妄取相故，如經善男子！是名諸菩薩摩訶薩十種發。

已說第二十種發，次說第三十種行。

D03 十種行

復次，善男子！諸菩薩摩訶薩有十種行。

何等為十？一者波羅蜜行，二者攝事行，三者慧行，四者方便行，五者大悲行，六者求助慧法行，七者求助智法行，八者心清淨行，九者觀諸諦行，十者於一切愛不愛事不貪著行。

善男子！是名諸菩薩摩訶薩十種行。

諸菩薩摩訶薩，有十種行。何等為十？

①波羅蜜行者，以助菩提法滿足故。

- ②攝事行者，以能教化諸眾生故。
 - ③慧行者，以如實觀生滅法故。
 - ④方便行者，以如實知一切法故。
 - ⑤大悲行者，以心不求證涅槃故。
 - ⑥求助慧法行者，以為得四無畏故。
 - ⑦求助智法行者，以為自然得一切法故。
 - ⑧心清淨行者，以於一切法中無疑惑故。
 - ⑨觀諸諦行者，以入第一義諦故。
 - ⑩於一切愛不愛事不貪著行者，如前所說離憎愛故。
- 善男子！是名諸菩薩摩訶薩十種行。

已說何等智。次說云何證，第四十一種無盡觀示現。

D04 十一種無盡觀示現

復次，善男子！諸菩薩摩訶薩，有十一種無盡觀。

何等為十一？一者身無盡觀，二者事無盡觀，三者煩惱無盡觀，四者法無盡觀，五者愛無盡觀，六者見無盡觀，七者助道無盡觀，八者取無盡觀，九者不著無盡觀，十者相應無盡觀，十一者道場智性無盡觀。

善男子！是名諸菩薩摩訶薩十一種無盡觀。

諸菩薩摩訶薩，有十一種無盡觀。何等為十一？

- ①身無盡觀者，以如實觀聖非聖有為無為身故。
- ②事無盡觀者，以如實觀實不實義故。

- ③煩惱無盡觀者，以如實觀淨染法故。
 - ④法無盡觀者，以如實觀上中下一切諸法故。
 - ⑤愛無盡觀者，以如實觀善不善法故。
 - ⑥見無盡觀者，以如實觀顛倒不顛倒見故。
 - ⑦助道無盡觀者，以如實觀種種門修集善根迴向大菩提故。
 - ⑧取無盡觀者，以如實觀無邊眾生界故。
 - ⑨不著無盡觀者，不著義如向所說。
 - ⑩相應無盡觀者，以如實觀是義非義故。
 - ⑪道場智性無盡觀者，以隨眾生信示現坐道場故。
- 善男子！是名諸菩薩摩訶薩，十一種無盡觀。

已說云何證。次說為何義，第五十種對治法示現。

D05 十種對治法示現

復次，善男子！諸菩薩摩訶薩有十種對治法。

何等為十？一者對治慳貪心，雨布施雨故。二者對治破戒心，身口意業三法清淨故。三者對治瞋恚心，修行清淨大慈悲故。四者對治懈怠心，求諸佛法無疲倦故。五者對治不善覺觀心，得禪定解脫奮迅自在故。六者對治愚癡心，生助決定慧方便法故。七者對治諸煩惱心，生助道法故。八者對治顛倒道，集實諦助道，生不顛倒道故。九者對治不自在心法，時非時得自在故。十者對治有我相，觀諸法無我故。

善男子！是名諸菩薩摩訶薩十種對治法。

諸菩薩摩訶薩，有十種對治法者，以十波羅蜜清淨故。何等為十？

- ①檀波羅蜜清淨。如經：「對治慳貪心，雨布施雨故。」
- ②尸波羅蜜清淨。如經：「對治破戒心，身口意業三法清淨故。」
- ③羸提波羅蜜清淨。如經：「對治瞋恚心，修行清淨大慈悲故。」
- ④毘離耶波羅蜜清淨。如經：「對治懈怠心，求諸佛法無疲倦故。」
- ⑤禪波羅蜜清淨。如經：「對治不善覺觀心，得禪定解脫奮迅自在故。」
- ⑥般若波羅蜜清淨。如經：「對治愚癡心，生助決定慧方便法故。」
- ⑦方便波羅蜜清淨。如經：「對治諸煩惱心，生助道法故。」
- ⑧願波羅蜜清淨。如經：「對治顛倒道，集實諦助道，生不顛倒道故。」
- ⑨力波羅蜜清淨。如經：「對治不自在心法，時非時得自在故」。

⑩智波羅蜜清淨。如經：「對治有我相，觀諸法無我故」。

善男子！是名諸菩薩摩訶薩，十種對治法故。

已說為何義。次說何處住，第六十種寂靜地示現。

D06 十種寂靜地示現

復次，善男子！諸菩薩摩訶薩有十種寂靜地。

何等為十？一者身寂靜，以離三種身不善業故。二者口寂靜，以清淨四種口業故。三者心寂靜，以離三種意惡行故。四者內寂靜，以不著自身故。五者外境界寂靜，以不著一切法故。六者智功德寂靜，以不著道故。七者勝寂靜，以如實觀聖地故。八者未來際寂靜，以彼岸慧助行故。九者所行世事寂靜，以不誑一切眾生故。十者不惜身心寂靜，以大慈悲心教化一切眾生故。

善男子！是名諸菩薩摩訶薩十種寂靜地。

諸菩薩摩訶薩，有十種寂靜地。何等為十？

- ①身寂靜，以離三種身不善業道故，
- ②口寂靜，以清淨四種口業故，
- ③心寂靜，以離三種意惡行故者，以三種戒善清淨故。
- ④內寂靜，以不著自身故者，以離邪我見故。
- ⑤外境界寂靜，以不著一切法故者，以離常無常法故。
- ⑥智功德寂靜，以不著道故者，以不著有物無物故。
- ⑦勝寂靜，以如實觀聖地故者，以不見聲聞辟支佛地，如實觀察諸佛菩薩聖地故。

- ⑧未來際寂靜，以彼岸慧助行故者，以遠離一切虛妄取相故。
- ⑨所行世事寂靜，以不誑一切眾生故者，以如實知世諦第一義諦，不顛倒說法故。
- ⑩不惜身心寂靜，以大慈悲心教化一切眾生故者，以為教化眾生，一切處生不疲倦故。

善男子！是名諸菩薩摩訶薩十種寂靜地。

已說證法界。自此已下，次說諸菩薩摩訶薩隨順如實修行義。

C02 諸菩薩摩訶薩隨順如實修行義

復次，善男子！諸菩薩摩訶薩，如實修行得菩提，非不如實修行得菩提。

善男子！云何名為「諸菩薩摩訶薩如實修行」？

善男子！如實修行者，如說能行故。不如實修行者，但有言說，不能如實修行故。

復次，善男子！諸菩薩摩訶薩，復有二種如實修行。

何等為二？一者智如實修行道，二者斷如實修行道。

善男子！是名諸菩薩摩訶薩二種如實修行。

復次，善男子！諸菩薩摩訶薩，復有二種如實修行。

何等為二？一者調伏自身如實修行，二者教化眾生如實修行。

善男子！是名諸菩薩摩訶薩二種如實修行。

復次，善男子！諸菩薩摩訶薩，復有二種如實修行。

何等為二？一者功用智如實修行，二者無功用智如實修行。

善男子！是名諸菩薩摩訶薩二種如實修行。

復次，善男子！諸菩薩摩訶薩，復有二種如實修行。

何等為二？一者善知分別諸地如實修行，二者善知諸地無差別方便如實修行。

善男子！是名諸菩薩摩訶薩二種如實修行。

復次，善男子！諸菩薩摩訶薩，復有二種如實修行。

何等為二？一者離諸地過如實修行，二者善知地地轉方便如實修行。

善男子！是名諸菩薩摩訶薩二種如實修行。

復次，善男子！諸菩薩摩訶薩，復有二種如實修行。

何等為二？一者能說聲聞辟支佛地如實修行，二者善知佛菩提不退轉方便如

實修行。

善男子！是名諸菩薩摩訶薩二種如實修行。

「復次，善男子！諸菩薩摩訶薩，如實修行得菩提，非不如實修行得菩提。

善男子！云何名為諸菩薩摩訶薩如實修行？如實修行者，如說能行故。不如實修行者，但有言說，不能如實修行故」者，以如所說如是修行，以不違先言故。

「復次，善男子！諸菩薩摩訶薩，復有二種如實修行。何等為二？一者智如實修行道，二者斷如實修行道。善男子！是名諸菩薩摩訶薩二種如實修行」者，以如實知證聲聞辟支佛智，而不取彼處以為究竟故。

「復次，善男子！諸菩薩摩訶薩，復有二種如實修行。何等為二？一者調伏

自身如實修行」者，以自取妙道如實修行故。「二者教化眾生如實修行」者，以化餘眾生令入正道如實說法故。如經：「善男子！是名諸菩薩摩訶薩二種如實修行」故。

「復次，善男子！諸菩薩摩訶薩，復有二種如實修行。何等為二？一者功用智如實修行」者，以作心行菩薩行功用智故。「二者無功用行智如實修行」者，菩薩於修道中住，以無作心行菩薩行無功用行智故。如經：「善男子！是名諸菩薩摩訶薩二種如實修行」故。

「復次，善男子！諸菩薩摩訶薩，復有二種如實修行。何等為二？一者善知分別諸地如實修行」者，以善智慧方便故。「二者善知諸地無差別方便如實修行」者，以入一相故。如經：「善男子！是名諸菩薩摩訶薩二種如實修行」

故。

「復次，善男子！諸菩薩摩訶薩，復有二種如實修行。何等為二？一者離諸地過如實修行」者，以離二邊故。「二者善知地地轉方便如實修行」者，以修行善法不休息精進故。如經：「善男子！是名諸菩薩摩訶薩二種如實修行」故。

「復次，善男子！諸菩薩摩訶薩，復有二種如實修行。何等為二？一者能說聲聞辟支佛地如實修行」者，以善學一切法故。「二者善知佛菩提不退轉方便如實修行」者，以證真如法如實知修行方便故。如經：「善男子！是名諸菩薩摩訶薩二種如實修行」。

善男子！諸菩薩摩訶薩，有如是等無量無邊如實修行。諸菩薩摩訶薩，應如

是學、如實修行。

諸菩薩摩訶薩若能如是如實修行者，速得阿耨多羅三藐三菩提，不以為難。

修行四種勝因，成就四種勝果，及餘如實修行故。彼勝果者，諸如來智，於一念中知三世事，皆相應故。

爾時，佛讚文殊師利法王子言：善哉！善哉！文殊師利！汝今善能為諸菩薩摩訶薩說本業道，誠如汝所說。

善哉者，以不顛倒說法故，隨順如來所說法故。

說是法時，十千菩薩得無生法忍。文殊師利法王子等，一切世間，天、人、阿修羅等，聞佛所說，皆大歡喜，信受奉行。

有三種義，是故歡喜。何等為三？

- ①說者清淨，以於諸法得自在故。
- ②所說法清淨，以如實證知清淨法體故。
- ③依所說法得果清淨，以得淨妙境界故。如經皆大歡喜，信受奉行故。

文殊師利菩薩問菩提經論

受持及讀誦 讚歎並宣說 福慧俱增長 災障悉消除 現眷咸安康 先親得超昇 見聞與隨喜 皆共成佛道



妙法寺 香港新界屯門藍地 <https://www.mfbm.hk>